

Tutu é kuvi ũun e táxnũu San Pedru

Taxnũu Pedru tú'un ãña ña ntákuinti'xe i da mí'i ka ntántoo ña

¹ Xu'u é Pedrú u ne, pustru ãña Jesúcrístú u. Taxnũu u tú'ũn sa'á ãña ña é ña te ntóo ñuú mii ĩ, ðivi ñã e ntántoo ñuú Pontú, ni ñũú Galaciá, ni ñũú Capadociá, ni ñũú Asiá, ni ñũú Bitinia,

² ña e nákaxnũu Xuva kō nte dí'na vatā o ntío ña. E tsóo xio Espiritũ Sántũ san nto vata koo é kãda ntaa nto é kãka'an Jesúcrístú ne, vata koo é ntũntoo nima ntó niñi ña. Ñá tē nté kaa na naxnuu viko Xuva ko ntō, na tā'xi ña é kuntōo vá'a nto utén uten.

É ntantétu ō é vã'a

³ Ká'an ō tsi dóo ka'nu Xuva ko, ðivi Uvã Tó'o ko Jesúcrístu, tsi dóo ntũntã'ví ini ña kō né, tā'xi ña é kaku xtuku o ntã'a Jesucristu da ntóto xtuku ña é xi'i ña. Dukuãn né, kuntōo díni ō é ntantétu o nũu i é vã'a é nĩ'i ko te kúvi.

⁴ Tsí ni'i ko uun doméni é ta'xi Xuva ko ãña i'xá ña. Ñá kantĩ'i doméní san. Vã'ã kue'én ne, ñã kunãá ntii dañu ntũvi. É tũví vã'á ãña nto e dukún kan tē xee nto.

⁵ Tsí da xe ntákuinti'xe nto Xuva kō ne, nã kue'én ini ña nada'an ña nto vata koo é xēe nto mí'i iō tu've é kũntoo nto ni ñã. Ta'xi ña é kũtuni nto sá'a ntuvi tē ntĩ'i ñuxiví sa.

⁶ Dukuãn né, kuvi kuntōo díni nto, kuãn te ntãnto'o nto vevii uun da'na dá iō nuu i e dóo ntii tũ'un.

⁷ Kãá kuaán san ne, kuãn té ña kaxntíi ntii dañu ntũvi, ntá tsi ntaé'mi ña vata koo é ntĩ'i un ntĩi ntĩi

nuu i é ña vá'a e ntádāka. Kuān ó kakuyi ni ntō da ntánto'o nto dī. Dukuān ó kanti'i nuu i é kīni ntāa é ñū'u nima ntó ne, kutuni te vá'a o ntákuinti'xe nto. Tsi dii dii ka nuu á'vi i é kuīnti'xe vá'a nto Xuva kō é vāta kaa kaá kuaán san. Kidāā né, tē kuīnti'xe vá'a nto, kuān te ntánto'o nto ne, ká'an Xuva kō tsi dóo va'á nto ne, ni'i nto dokofū'u ntuvi tē naínu xtúku Jesucristu.

⁸ Dōo ntio nto Jesucristú, kuān té vata kiní nto ña. Kuān té ña kaíni ntó ña vevii ne, ntákuinti'xe nto ña. Dukuān ne, ñá tē nté kaa diní nto. Ntē ña xee tá'an tú'ūn é ká'an nto nté kaa e dīnī nto, tsí vata tsi tē ntōo nto e dukún kán vevii.

⁹ Tsí da xe e kuīnti'xe nto ne, é nakáku nima nto.

¹⁰ Ntuvi di'na ne, ña é ka'án naa Xuva kó ne, ntáka'an ñá nuu i é vā'á san é nī'i nto vevii. Dōo nántuku ña, dōo tsíxe'e ña kuēnta iña i sá'ā.

¹¹ Xé'e Ēspíritū Cristu é kūtuni ñá nte dí'na nee iña é vē'xi é ntó'o Cristú, ni nūu i é vā'a é nī'i ñá rkontuyi. Dōo dé kuení ña xoo ná'a ntu é vii ña sá'ā ne, amá ntu kuví dī.

¹² Ntá tsi xe'é Xuva kō é kūtuni ña tsi tú'ūn e ntáka'an ñá ne, ñá tē é vā'á mii ñā, tsi é vā'á mii ntō. Tsí divi tú'un e ntáka'an ñá ni ntō vevii, ña e ntáka'an ntódo tú'ūn é nakáku ō. Kaxé'e Ēspíritū Sántū, ña e táxnuu Xuva kō nte e dukún kán, é kuān o ntáka'an ñá ne, ñá tē nté kaa ntio ánjē sán kutuni ñá nuu i sá'ā.

Kana Xuva ko kō é vā'á kue'en na kuví o

¹³ Dukuān ne, koo tú've nto. Kuntitō xnto. Ntánī nima ntó kuntētu nto nuu i é vā'á san é nī'i nto te naínu xtúku Jesucristu.

¹⁴ Vatā ó de i'xa é kāde ntaa ne, ñá vii ka nto é ntio nima kīni kaa nto, vata ō dé nto kídaā dá vata kutú've nto iña Xuva ko.

¹⁵ Ntá tsi é un nti'í é viī ntó ne, vií nto é vā'á kue'en, vatā ó de Xuva kō, ña e kána nto.

¹⁶ Tsí kaka'an tú'un Xuva kō: “É vā'á kue'en kuvi nto, vata tsi ó va'á mii u”, ka'an ña.

¹⁷ Xuva kō ne, kaito nteé ña kō é un é un o te vā'á o, tē ña vá'a o kade ō; ñá kāde ña kuenta xoo ñá'a ō. Tē ntáka'an nto Úva nto ñā ne, kuntoo koñu'u nto dá kanii ntūvi e tá'xi ña é kuntōo nto ñuxiví sa.

¹⁸ Ini nto tsí da nakáku ña kō é dōto tsi ntáde o nuu i é ña kaidiá'vi vatā xkoó ini uváta kō, ña intóo kídaā ne, ñá tē diu'un ni ntá'vi ña kuenta iña kó, ntē ña té diu'un kui'xín, ntē ña te káa kuaan, nté da nēé ka nuu i é kanatívi.

¹⁹ Tsí niñí Cristu e dóo nuu á'vi i e ntá'vi ña iña ko. Cristú ne, vata kaa a le'ntu é ña tuví nee kuetsí i, é ña ni kuléntū, kaa ña.

²⁰ Nté dī'na dá iñi ntu'u ñuxiví san ne, dē kú've Xuva kō é kuān koo kuvi ña. Ntá tsi dā nté ntuvi sá'a dá dokó sa nti'í ñuxiví sa ne, taxnuu Xuva ko ñā é vā'á tsi mii ntō.

²¹ Tsí kuenta iña ñá ne, ntákuinti'xe nto Xuva kō. Tsí Xuva kō ne, nantóto ña ña dá xi'i ñá ne, xé'e ñá e dóo ka'nu ña'a kúvi ña, vata koo é kuinti'xe nto Xuva kō, vata koo é kūtuni nto tsí nta'a ña vé'xi é un nti'í é vā'á iña nto.

²² É ntūntoo nima ntó e kuínti'xe nto é nuu é ntaā i. Vevíí ne, nñ kue'én ini nto na kuñnima ntó ta'an nto, ña ntákuinti'xe i san. Dukuān né, koo ntii ntō é kuñnima ntí'xe nto ta'an nto kanii nima nto.

²³ Tsi e ní'i nto ntuví xéé iña nto é vata kaa te ūvi íto káku nto. Ntá tsi ña te kuenta iña uva nto ña é xi'i e káku nto ve, tsí dīvi tū'ún Xuva kō é kántito ntii dañu ntūvi.

²⁴ Tsí uve na'a kaka'an tú'un Xuva kō:

Un ntíí ntíí ña'a sán ne, vata ntáa xuku ntáa ña.

E dóo nuu á'vi i iña ña veví ne, vata ntáa laa xuku ntáa.

Kaxi'i díi xuku i sán ne, kanakó'xo laa i,
²⁵ ntá tsi tú'un Xuva kō ne, kutūví ntii dañu ntūvi,
 ka'an. Tū'ún tsikán ne, ñivi tū'un é vā'a e ntáka'an
 ntódo ña ni ntō.

2

¹ Dukuān ne, ñá víi ka nto nté uun ká nuū i é kīni kaa. Ná kanī nta'ví ka nto ta'an nto. Ná te ūvi nuu i víi nto. Ná ku kune'ū iní ka nto. Ná kā'án ka nto é kīni kaa iña ta'an nto.

² I'xa é dā ve káku ne, dōo kanantukū é tsītsi. Kuan koo nantūku nto tú'un Xuva kō dí, ñivi tū'un é vā'á kue'en. Kuān koo kue'nu nto da nté nāni'i kué'en nto ntuví va'á iña nto.

³ Tsi é ĩni ntó ve e dóo va'á Xuva kō.

Cristú ne, vata kaa xuu é kántító kaa ña

⁴ Ki'xi etsin nto Cristu vé, ñivi ñā é vata kaa xuu é kántító kaa ña. É nakuítá ña'a san xuú san, ntá tsi Xuva kō né, ñivi xūu é nakaxnúu ña, e ña te nté kaa nuu á'vi i kuenta iña ña.

⁵ Ñivi ntō né, vata ntáa xuu é kántító ntáa nto ñi. Kué'e ntō é víi Xuva ko ni ntō vata koo é kūvi nima ntó ví'i ña. Ta'xi ña é víi ntó dutu ñā ñi, vata koo é kue'é nto ña doméni ntuví iña nto vata o ntío ña. Kí'i ña doméni nto, tsí ntuvá'a nto ni ña kué'nta iña Jesúcristu.

⁶ Tsí uve na'a kaka'an tú'un Xuva kō:
 Uun kaa xuu e xtúvi ú ñuú Siuún ne,
 uun xuu é nakaxnúu u é kodo nūu,
 uun xuu e dóo nuu á'vi i.
 Xoo é kākuinti'xe i ne,
 ñá kuntā'xa iní ña kuenta iña i,
 ka'an.

⁷ Dukuān né, ntō'lo e ntákuinti'xe ntó ña ne, ñá tē nté kaa va'á ña, kuiní nto. Ntá tsi ña'a, ña é ña ntákuinti'xe i ña ne, nto'lo ña vatā ó uve na'a kaka'an tú'un Xuva kō:

Xúū é nākuíta ña ntáde vá'a vi'i san ne,
dīvī kúvi xuu ódo nūu éti vi'i san,
ka'an.

⁸ Kaka'an xtúku tú'un Xuva kō:

Naki'í ña'a san xuú san ne,

ntava ntodó ña,

ka'an. Tsi ntava ntodó ña tē ña kuintí'xe ña tú'un Xuva kō. Tsi kuan ō de kú'vē ña é kōo.

⁹ Ntá tsi dīvi ntō ne, ña'a é nakaxnúu Xuva ko kúvi nto. Dutu iñá rei kúvi nto ne, uun tatá ña'a é ntūntoo nima i kúvi nto, tsi ntáduku ntée nto Xuva kō. Kuān ó ni ntō vata koo é kā'an nto tsi dóo vá'ā o dé Xuva kō tsi e nátavā ñá nto mí'í e dóo neé san ne, da tsóo ña nto mí'í e dóo vá'a kaxi'í nuu mí tuví ña.

¹⁰ Di'na ne, ñá tē nee ñá'a nto, ntá tsi veví ne, ña'a Xuva ko ntō. Di'na ne, xoxó ña'a é kantunta'ví ini ña nto, ntá tsi veví ne, kantunta'ví ini Xuva ko ntō.

Kada tsiñu nto iña Xuva ko

¹¹ Ení ko e dóo ntio kó nto, vata ntáa ña tuku ñuu ntáa nto, é vata te vē'xí taan xnto ñuxiví sa. Dukuān ne, kaikán u nto tē ña víi nto é kīni kaa é ntio kúñu ntō é kanāa ntée nima nto.

¹² Vá'ā koo víi nto dá ntoo nto mé'ñū ña'a, ña e ñá ini Xúva kō. Dukuān né, kuān te ntáka'an kīni ña iña nto vevíi tsi ña te vá'ā ó de nto ne, ntá tsi kiní ña tsi ntáde nti'xe nto é vā'a. Kidáā né, te vē'xí Xuva kō é vēxkada kú'vē ñá ne, ká'an ñā tsi dóo ka'nu Xuva kō.

13 Kuenta iña Tó'o ko Jesūcristú ne, kuiko ñu'u nto ūn ntíí ntíí ña uve da neé ka tsiñu, kuān té ña tsiñu na'nu i, tsí ñi ñā é odo nūu ña,

14 o kuān té ña tsiñu i san é kataxnūu ña. Tsí ñi ñā é kuē'é ña na ntō'o ña ntáde é kīni kaa sán ne, ō é kā'an ña e dóo vá'ā ó de ña ntáde ntaá san.

15 Ntio Xuva kō é kuān koo vií nto vata koo é ña kuvi ka'an ntée ña tuntú san nto, ña é dotō tsi ntáka'an.

16 Kuān té xoxó ka taxnuu i nto nté koo vií nto, ntá tsi ña ku dotō tsí vií nto é kīni kaa, tsí vii nto é vā'á vata tsí ó de ña ntáde tsiñu iña Xuva ko.

17 Kuiko ñu'u nto ūn ntíí ntíí ña'a san. Kuinima nto un ntíí ntíí ta'an nto, ña ntákuinti'xe i san. Kuiko ñu'u kuē'en ntó Xuva kō. Kuiko ñu'u ntō ñá odo nūú san.

Koto nto nté ō ntó'o Cristu

18 Nto'o e ntáde tsiñu nto ne, kada ntaa nto e ntáka'an tó'o ntō. Kuān te vá'a ña'a ña ne, ntántunta'ví ini ña nto, kuān te dóo diin ñá ne, ntá tsi kuiko ñu'u nto ña.

19 Tsí kaka'an Xúva kō tsi vá'ā ó te kutíí ō é nto'o ko kuēnta iña nuu i é ña te kuétsi ko, tē ntáde ntaa o e ntío ña.

20 Te nī'i nto é nto'o nto te vii nto é kīni kaa ne, ¿va dóo ntu nuu á'vi nto e kūtíí nto é ntō'o nto iña kuétsi nto san? Ntá tsi te kūtíí nto nto'o nto kuenta iña nuu i é vā'a é edé nto ne, tsíkān é nuu á'vi i, kuiní Xuva kō.

21 Ñi ñā tsi tsiñu kána Xuva ko ntō é vii nto. Ini nto nté o ntó'o Cristu kuenta iña nto. Dukuān ne, náñe'e ñá nto nté koo vií nto vatā o dé ña. Kuān tsi koo vií nto ñi.

22 Ñi ñā ne, nté uun ito ña ni ide ña é kīni kaa; nté uun ito ña ni eni ntá'ví ña ña'a.

23 Dā ka'an kīni ña'a san ni ñá ne, ñá ni nantiko koō ña nté uun é kīni kaa. Dā ntó'o ña ne, ñá ni

kā'an ñã te ntanáa ñã. Ntá tsi ntáda ñã kuenta ntá'a Xuva kō, ñã e dóo ini é xntékú kũ'vé va'a.

²⁴ Mii ñã ído ñã kuétsi kō kúñu ñã dá xi'i ñã ntíkã krusi kan vata koo é ñã vií ka ō é kīni kaa, tsí vii o da mií é vā'a. Dìvi ñã ni'i kui'í ñã vata koo é ntuvá'a nto.

²⁵ Tsí di'na ne, ntaíka xaa nto vata ntáa le'ntu, ntá tsi e ntíko koō nto mí tuví paxtu ntó, ñã kanada'an nima nto.

3

Nté koo vií ñã e éni vi'i

¹ Dukuān dí, ñadĩ'í, kuiko ñu'u ntō xii nto, vata koo te iō ñã é ñã ntákuinti'xe i tú'un Xuva kō ne, nakaku ñã, kuān te nté uun tú'ūn ñã ni ka'an ntó ni ñã, tsi dóo vá'ā o ntáde nto utén uten.

² Tsí ini ñã tsi dóo vá'ā ó de ñadĩ'í ñã, tsi dóo koñy'u ñã.

³ Ñã te e ntántukutu ntō né, ntē ñã te dóo vá'ā o ntánekin nto díki nto, ntē ñã te kiti e kúvi kaá kuaan kañú'u nto, ntē ñã te dú'nu e dóo va'á kue'en.

⁴ Tsi é nuu xū'ú nima ntó kán, e dóo vita ini nto, e dóo ñikādín nima nto. Tsíkán e díí ka nuu á'vi i nuu Xuva ko, tsí ñadĩ'í é ñã te kánativi kue'en.

⁵ Tsí kuan ō dé ñadĩ'í va'á san kídaā dí, ñã ntákuinti'xe i Xuva kō. Edé ntaa ñã e ntáka'an xii ñã,

⁶ vata ō dé ntaa Sárā san é káka'an Ábraan. Kaka'an ñã tsi tó'o ñã ñã. Dìvi ntō ne, i'xá ñã nto te vií nto é vā'á ne, nté uun nuu i ñã te ntaú'vi nto.

⁷ Dìvi ntō dí, ñatii, kuenta vií nto ñadĩ'í nto, tsí ñã túvi ntii ñã vatá ó iō ntii nto. Kuiko ñu'u nto ñã, tsí dadii tsi ni'i nto ntuví va'á iña nto ni ñã nta'a Xúva kō. Kuān koo vií nto vata koo é ñã te neé kadí nuu i tē ntáka'an ntâ'ví nto.

Ña e ntánto'o i e ntáde é vā'a

⁸ Uun ká xtuku nuu i ká'ān ú ni ntō. Kuédadii tsi nima ntó, un ntií ntií nto. Na kāxnúu nto ta'an nto nee iña e ntánto'o ña. Na ntuntā'ví ini nto ta'an nto. Kuinima ntó ña. Nā vīi ka'nu nto ni ñā.

⁹ Tē ntáde ña'a san é kini kaa ni ntō ne, ña nantíko koō nto é kīni kaa sán di. Tē ka'an kīni ña'a san ni ntó ne, ñá ku kā'an kīni nto ni ñā, tsi vá'a koo ka'an ntó ni ñā. Tsi kána Xuva ko kō vata koo é ta'xi ña kō é vā'a.

¹⁰ Tsí uve na'a kaká'an tú'un Xuva kō:
Tsí xoo ñá'a é ntio ña e dóo vá'a koo kuita ntí'xin
ntuvi iña ñá ne,

kuenta na víi ña é ña ká'an ña é kīni kaa,
é ña kaní nta'ví ña ta'an ña.

¹¹ Na xtuvī mii ña é vii ña é kīni kaa ne,
na vii ña é vā'a.

Na nantukū ña nté koo kuntoo vá'a ña ni tā'an ña.

¹² Tsí kainí Xuva ko xōo é vā'á ña'a ne,
katekú ña te kāka'an ntā'ví ña ni ñā,
ntá tsi ña ncho kini ña xoo é kīni ntāa i,
ka'an tú'un Xuva kō.

¹³ ¿Xoó ntu kuvi vii i ni ntō é kīni kaa te dí mii tsi
nuu i é vā'a ntáde nto?

¹⁴ Ntá tsi te nto'o nto kuān te ntáde nto é vā'á
ne, kuntōo dīnī nto. Nā ku dā vá'a nto tē xoó ña'a
nau'vi ñá nto. Ntē ña kutsú'un nto kuenta iña ña.

¹⁵ Tsí kini vá'a ntó nima nto tsí Cristú ne, díi ka
ka'nu ña. Divi ñā e Tó'o kō. Koo tú've nto nté koo
ka'an ntó ni da xōo ka ña'a te tsixe'e ña ntō nté kui
kuínti'xe nto. Ntá tsi ña víi ka'nu nto. Kuiko ñu'u
nto ñā.

¹⁶ Vā'ā koo víi nto vata koo é dīnī kunuū nima
nto. Kidāā né, tē ka'an kīni ña'a san iña nto da ntáde
nto é vā'a e ntákuinti'xe nto Cristú ne, divi ñā ne,
kuka'an nuu ña.

17 Tsí díí ka vá'ā ó te nto'o kō da ntáde ō é vā'á san naa i é nto'o kō da ntáde ō é kīni kaa sán, te kuan kōo é ntio Xuva kō.

18 Tsí mii tsī Cristu ntó'o ña dá xi'i ña é uun ito tsi kuenta iña kuétsi kō. Dívi ña é ña tuvi kuétsi ña ne, xí'i ña kuétsi iña ko xo'o é iō kuétsí kō, vata koo é kī'in ni'i ña ko nuu Xuva ko. Xí'i kúñu ña, ntá tsi nima ñá ne, ntōto xtuku.

19 Dukuān o ñé'e ña, ixka'an ntódo ña mí'i ñu'u kutū nima ña é xi'í san.

20 Ña tsikán ne, ña intóo kídaā é ña ni kuintí'xe i, kuān te kutíi Xuva kō intétu ña ña ñi dukuān de vá'a Noeé san tun ntōó ka'nu san. Úna ñá'a kudii nakáku ña é ñu'u vá'a ña iní tun ntōó san dá nakuntéku teni nú ntute kán.

21 Kuan kōo vevíi ne, ntántada náa o iña ña é nakaku mé'ñu ntute san, tsí nakáku o te ítsi ntute ō. Ñá tē tsi kúñu dentu kō é ntuntoo, tsí nima ko é ntūvá'a ni Xuva kō kuenta iña Jesúcristu, dívi ña é ntóto xtuku ña dá xi'i ña.

22 Kúntāa ña e dukún kan vē ne, tuví ña diñi kua'a Xuva kō. Doo ntaíko ñu'ū ánjē san ñá, ni ūn ntíí ntíí ña odo núu san.

4

Kada tsiñu o vatā o tá'xi Xuva kō é kūvi vii o

1 Tsi dúkuān né, vata ō ntó'o Cristu ni kúñu ña ne, kuan koo kadā kuení nto tsí kuyi vií nto é ntó'o nto dí. Tsí xoo ñá'a e ntó'o ña nī kúñu ña ne, é xtuví mii ña é vii ña é kīni kaa,

2 vata koo e dá ntōo ká ña ñuxiví san ne, ñá víi ka ña é ntio kúñu ña, tsí vii ña é ntio Xuva kō.

3 E xée ntuvi é tsoo mii ntō é edé nto vatā o dé ña'a sán dí, ña é ña ntákuinti'xe i Xuva kō. Tsi é un ntí'í é kīni ntáa ntáde ña. Ncho kada xení ña ni ñadí'i. Ntáde kí'vi ña. Da mii kuē'en tsi dodíni ntáde

ña. Dōo ntáxi'i ña. Ntaínúu ini ña tuku xuva ñā e ña ntío kue'en Xúva kō.

⁴ Dā kúdu'va ña e ñá ncho kuve ta'an ká nto ña e ntáde ña nuu i é kīni ntáa ne, ntáka'an kīni ña iña nto ve.

⁵ Ntá tsi nakué'e ña kuenta ntá'a Xuva kō nté o dé ña. Tsí Xuva ko xntēkú ku'vē ña iña ñá ntantító nī ña é xi'í san.

⁶ Dukuān ne, ká'an ntōdó ña tú'ūn va'á san nī ña é xi'í san di vata koo é kuntító ña kuenta iña Xuva kō, kuān te ni'i kúñu ñā é ntō'o i.

⁷ Dóko sā ntí'i un ntíi ntíi nuu í ve. Dukuān né, kadā kuení va'a nto. Diin diin tsi kuntōo nto vata koo é kūvi ka'an ntá'ví nto kaníi nima nto.

⁸ Uun nuu i e dií ka va'a é vii ntó ne: dōo kuinima ntó ta'an nto utēn. Tsí te kuñima kó ta'an kō ne, kada ka'nu iní o ni ña, kuān te dōo iō kuetsí ña.

⁹ Ñá ku dē víni nto vi'i nto é kutūví ta'an nto.

¹⁰ Tsí e tá'xi Xuva ko tsiñu é vā'a é vii o é un é un ō. Na vii ó tsiñu é vā'a san é vā'a ta'an ko vatā ó de ña ñu'u nta'a i tsiñu na'nu é xe'é Xuva kō.

¹¹ Xoó ña'a é kākā'an ñá ne, na kā'an ñá vata ō xe'é Xuva kō é kā'an ña. Xoó ña'a é kaxntii ña tā'an ña ne, na kōo ntii ña vii ñá vata ō xe'é Xuva ko ntii ñā é vii ñá, vata koo é da nēé ka é vii ó ne, ká'an ñā'a sán tsi dōo va'á Xuva ko ni i'xā ñá Jesucristu. Ká'an ō tsi dōo va'á ña. Na kadā kû'vé ka ña é un ntí'i ntii dañu ntūvi. Kuan tsi koo na kōo.

É nto'o kō é kuntīkin ó Cristu

¹² Ení ko e dōo ntio kó nto, ñá ku kadā kuení nto te ñū'u nto mé'ñū ñu'u é kaí'xí san é kaíto nteé Xuva ko ntō.

¹³ Ñá ku da kudū'va nto, tsi dīnī koo kuntōo nto e ntánto'o nto vata ō ntó'o Cristu, vata koo é dií dií ka diní nto ntuvi tē naínu xtúku ña, tē ntii dítō ña é kāxi'í nuu ka'nu ña.

14 Te kā'an ntée ña'a san nto tsi ntákuinti'xe nto Cristu ne, dōó diní nto tsi Espíritu Xuva kō e dōo va'a vexkútuvī ñá ni ntō.

15 Ió ña'a ne, ntánto'o ña e é'ni ña ña'a ne, ō du'u ña ne, o dé ña é kīni kaa ne, ō kini nuu ña iña ña'á san. Nta tsi ña kuān koo vií nto.

16 Ntá tsi te xoó ña'a ntánto'o ña e ntántikin ñá Cristú ne, ñá kūka'an nuu ña. Tsí nakué'e ña sintiá'vi nta'a Xuva kō é xe'é ña é kuān koo nto'o ña kuenta iña ña.

17 E xée ntūvi é xntekú kū'vé Xuva kō. Te dī'na xo'o xntekú ku'vê ñá iña kó ne, ¿nté koo vií ña ni ñā'a san, ña é ña ntákuinti'xe i tú'un Xuva kō?

18 Tē dá kuētsi ntánakáku ña é vā'á san ne, ¿nté koo kuvi nī ña ntáde é kīni kaá san, nī ña é iō kuetsí i san?

19 Dukuān né, divi ñā e ntánto'o ña tsí kuān o ntío Xuva kō é vií ñá ne, ñá kōó da'na é vií ña é vā'a. Na ntāda ña kuentá nima ñá nta'a Xúva kō, ña é ede vá'a ña, ña e nté uun ito ña tsoo míi ña ñā.

5

Itsi iña ña ntákuinti'xe i

1 Vi'a ve ne, ncho kué'e ú itsi iña ñáta, ña odo nūú iña nto. Xu'ú ne, ñatā ú di ne, iní u nté ō ntó'o Cristú ne, dad̄i tsi ni'i ko ni ntō é vā'a é tā'xi ña ko te naínu xtúku ña.

2 Kuenta vií nto ña e tá'xi Xuva ko nto vatā ó kade paxtú san kuenta a le'ntu ña. Ñá te kué'e kuétsi ña nto é vií nto, tsi dodíni nto vií nto. Ñá tē é diu'un ntío nto, tsí kan̄i nima ntó vií nto.

3 Ñá ku vií nto tó'o ña'a, ña e ntáde nto kuenta, tsí nañē'e ntó ña nté koo vií ña vatā o ntáde nto.

4 Tē ntii díto paxtu ñá odo nūú san ne, ní'i ntō doméni e dōo va'a é ña kantí'i.

⁵ Dukuān dí, na kuetsī, kuiko ñu'u nto ñata, ña odo nūu san. Un ntíi ntíi ntó ne, ñá víi ka'nu nto ñi tā'an nto. Tsí uve na'a tú'un Xuva ko kākā'an: Ñá kaxntii Xuva ko ñā'a, ña e ntáde na'nu iña mii i, tsí kaxntii ña ña ntā'vi, ña é ña ntáde na'nu san, ka'an.

⁶ Ntā'vi tsí koo víi nto nuu Xuva ko, ña e dóo ntii iní í, vata koo é kada ka'nu ña nto tē xee ntúvi.

⁷ Da nēe ka nuu i e ntádē kuení nto ne, ntada nto kuenta ntá'a ña, tsí ñi ña kade ña nto kuenta.

⁸ Ntítō víi nto kuntōo nto. Koto nto tsi é ña vá'ā sán ne, kanāa ntée nto vatā ó de ñaña, kiti kakachu'u ntáa é kaika ti kanantuku ti nee iña é kā'xí ti.

⁹ Ñá víi nto é ntio i, tsí kuinti'xe vá'a nto Xuva kō. Tsí ini nto tsí dadíi tsi ntánto'o ta'an nto dá kaníi ñūxiví sa.

¹⁰ Ntá tsi tē kúvī é ntō'o kudii nto ne, Xuva ko tā'xi ña é kuinti'xe kue'en nto. Ta'xi ña é kūtíi nto é un ntíi. Ta'xi ña é kūtū've vá'a nto nee iña e ntákuinti'xe nto, tsí ñi ña e dóo va'á ña. E kána ña kō é nī'i ko é vā'á nta'a Cristú ne, ntavá'a ña nto.

¹¹ Ká'an ō tsi dóo va'á ña, tsí kuvi víi ña é un ntíi ntii dañu ntūvi. Kuan tsi koo na kōo.

¹² Nta'a ení ko Silvanu, ña e dóo de ntaa, kuíni ko, de vá'a ú tutú sa'a vata koo é tā'xi kudíi u nto itsi, vata koo é kā'án u ni ntō tsi sá'ā é nuu é ntaā i iña é vā'ā e tá'xi Xuva ko kō. Itsi sá'á tsi kuntikín nto.

¹³ Ña ntákuinti'xe i, ñá ntoo ñuú Babiloniá ne, taxnúu ña ntíusi nto. Dadíi tsi nakaxnúu Xuva ko ña ni ntō. I'xá ko Marcú ne, taxnúu na ntíusi ntó di.

¹⁴ Nanume nto ta'an nto é kuinima tá'an nto é nuu é ntaā i.

Vā'a vá'a tsi koo kuntōo nto, un ntíi kue'en dú'va nto, tsi ntáduku ntée nto Cristu.

**Tū'ún xuva kō vatā ó ntáka'an ña ñuú
Coatzospan
New Testament in Mixtec, Coatzospan
(MX:miz:Mixtec, Coatzospan)**

copyright © 2003 Wycliffe Bible Translators, Inc.

Language: Mixtec, Coatzospan

Translation by: Wycliffe Bible Translators, Inc.

Copyright Information

© 2003, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Coatzospan

© 2003, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

8f775598-56d9-56fd-966e-15e054d2f275